



Centralna banka
BOSNE I HERCEGOVINE
Централна банка
БОСНЕ И ХЕРЦЕГОВИНЕ



SEDMIČNI PREGLED KRETANJA NA GLOBALNIM FINANSIJSKIM TRŽIŠTIMA

14. 7. 2025. – 18. 7. 2025.

ODJELJENJE ZA BANKARSTVO, SLUŽBA FRONT OFFICE




Sarajevo, 21. 7. 2025. godine**SEDMIČNI PREGLED KRETANJA NA GLOBALNIM FINANSIJSKIM TRŽIŠTIMA**
14. 7. 2025. – 18. 7. 2025.**Tabela 1: Prikaz kretanja prinosa na državne obveznice**

Prinosi	Eurozona			SAD			Velika Britanija			Japan		
	11.7.25	-	18.7.25	11.7.25	-	18.7.25	11.7.25	-	18.7.25	11.7.25	-	18.7.25
2 godine	1,90	-	1,87	↘	3,89	-	3,87	↘	3,86	-	3,90	↗
5 godina	2,29	-	2,24	↘	3,97	-	3,95	↘	4,04	-	4,09	↗
10 godina	2,73	-	2,70	↘	4,41	-	4,42	↗	4,62	-	4,67	↗

Tabela 2: Prikaz kretanja prinosa na njemačke Bubillove

Dospijeće	Prinosi		
	11.7.25	-	18.7.25
3 mjeseca	1,839	-	1,829
6 mjeseci	1,738	-	1,666
1 godina	1,809	-	1,792

Grafikon 1: Prikaz krivulja prinosa državnih obveznica

Grafikon prikazuje krive prinosa Njemačke (zelena), SAD (plava), Velike Britanije (crvena) i Japana (ljubičasta) za periode od 3 mjeseca do 30 godina na dane 18. 7. 2025. godine (pune linije) i 11. 7. 2025. godine (isprekidane linije). Na donjem dijelu grafikona je prikazana razlika između vrijednosti odgovarajućih prinosa na navedene datume.

EUROZONA

Prinosi obveznica eurozone nisu bilježili veće dnevne promjene tokom prošlosedmičnog trgovanja. U odnosu na prethodnu sedmicu prinosi su smanjeni, pa su prinosi njemačkih obveznica zabilježili pad između 3 i 5 baznih poena, prinosi francuskih obveznica između 2 i 5 baznih poena, a prinosi italijanskih obveznica između 2 i 6 baznih poena. Istraživanje Bloomberg-a je pokazalo da ECB može da odgodi posljednje smanjenje kamatnih stopa u ovoj godini do decembra, bez toga da investitori zaključie da je okončan proces smanjenja kamatnih stopa. Zamjenik premijera Italije Tajani je pozvao ECB da smanji kamatne stope kako bi podržala ekonomiju i oslabila euro, koji smatra prejakim u odnosu na dolar. Tajani je predložio smanjenje kamatnih stopa na 1% ili 0,5% i nastavak kvantitativnih olakšica putem kupovina obveznica zemalja EU. ECB je već osam puta smanjila kamatne stope od juna 2024. godine do nivoa od 2%, a tržišta očekuju pauzu u julu i potencijalna daljnja smanjenja u septembru.

EU je odobrila 18. paket sankcija Rusiji, uključujući ponovno razmatranje najvišeg nivoa cijene nafte i zabrane uvoza naftnih derivata. Evropski sekretar za trgovinu Šefčović upozorio je da će predložene tarife, koje bi trebale stupiti na snagu 1. augusta, učiniti trgovinu između EU i SAD-a gotovo nemogućom i ozbiljno poremetiti transatlantske lance snabdijevanja. Napomenuo je da je EU bila blizu sporazuma sa SAD-om prije Trumpove neočekivane objave i da blok sada razmatra recipročne mjere. EU je najavila da će se trgovinske mjere odnositi na američke avione i automobile u slučaju da trgovinskim pregovorima ne uspiju smanjiti tarife do roka. Također, član UV ECB Nagel je pozvao na opreznost usred neizvjesnosti oko američkih carinskih prijetnji, ističući nepredvidiv uticaj geopolitičkih

Odricanje od odgovornosti (Disclaimer)

Navedeni pregled kretanja je zasnovan na eksternim izvorima i ne sadrži bilo kakve komentare, procjene i stavove CBBiH. Centralna banka ne može garantovati njihovu tačnost i ne snosi odgovornost za direktnu ili indirektnu štetu koja može nastupiti kao posljedica korištenja ili nemogućnosti korištenja informacija, materijala ili sadržaja, ili za posljedice odluka donesenih na osnovu njih.

tenzija i trgovinskog sukoba između SAD-a i EU na cijene. Nagel je upozorio na mogućnost da američke carine od 30% odvedu Njemačku u recesiju do kraja 2025. godine slabeći ekonomiju koja je fokusirana na izvoz. Bitno je istaknuti da se udio Njemačke na izvoznom tržištu smanjio od 2017. godine, a gubici su se povećavali od 2021. godine, pod uticajem strukturnih problema kao što su poremećaji u lancu snabdijevanja, visoki troškovi energije, konkurencija iz Kine, demografikonija, birokratija i porezi. EU priprema tarife na američke usluge i uvozne kontrole kao dio odgovora predsjedniku Trumpu na carine koje su planirane 1. augusta. Mjere koje se pripremaju uključuju takse na digitalne usluge i uvozne carine na čelik i hemikalije, kao nadogradnju plana koji obuhvata 72 milijarde EUR američkih uvoznih dobara.

Kancelar Njemačke Merz je izrazio dodatno protivljenje namjeri Unicredit banke da preuzme Commerzbank, te je kritikovao „neprijateljski pristup“ ove italijanske banke, a istovremeno je upozorio na potencijalni finansijski rizik koji bi nastao spajanjem ovih banaka usljed strukture njihovih bilansa. Premijer Francuske Bayrou planira predložiti uvođenje novih poreza za one s najvećim primanjima i ograničavanje određenih poreskih olakšica, kao i ukidanje dva državna praznika kako bi se smanjio deficit za 2026. godinu. Očekuje se da će prijedlog pokrenuti parlamentarnu debatu i potencijalno riskirati još jedan kolaps vlade. Guverner Banque de France Villeroi de Galhau je podržao plan od 43,8 milijardi EUR premijera Bayroua da smanji budžetski deficit, nazvavši ga važnim za kontrolisanje javnog zaduživanja i rast ekonomije.

ECB napreduje s inicijativom uvođenja digitalnog eura u smislu napretka u razvoju pravilnika, tehničkih testova, koji uključuju 70 učesnika i konsultacija s malim trgovcima, ranjivim potrošačima i udruženjima. Formalna odluka o izdavanju digitalne valute očekuje se u oktobru, a rezultati testiranja će biti objavljeni u trećem kvartalu. Dok zvaničnici ECB podržavaju inicijativu, banke izražavaju zabrinutost zbog troškova infrastrukture, a kritičari upozoravaju na rizike za anonimnost plaćanja.

Tabela 3: Kretanje ekonomskih indikatora za eurozonu

Red. br.	Ekonomski indikatori		Očekivanje	Stvarno stanje	Prethodni period
1.	Trgovinski bilans – EZ (u milijardama EUR)	MAJ	14,0	16,2	15,1
2.	Trgovinski bilans – Irska (u milijardama EUR)	MAJ	-	12,27	11,12
3.	Trgovinski bilans – Španija (u milijardama EUR)	MAJ	-	-2,54	-3,88
4.	Trgovinski bilans – Italija (u milijardama EUR)	MAJ	-	1,67	0,36
5.	Bilans tekućeg računa – EZ (u milijardama EUR)	MAJ	-	32,3	18,6
6.	Bilans tekućeg računa – Njemačka (u milijardama EUR)	MAJ	-	9,6	18,9
7.	Bilans tekućeg računa – Francuska (u milijardama EUR)	MAJ	-	-3,1	-6,6
8.	Bilans tekućeg računa – Italija (u milijardama EUR)	MAJ	-	1,67	0,36
9.	Industrijska proizvodnja – EZ (G/G)	MAJ	2,2%	3,7%	0,2%
10.	Output građevinskog sektora – EZ (G/G)	MAJ	-	2,9%	4,7%
11.	Javni dug – Italija (u milijardama EUR)	MAJ	-	3.053,5	3.063,5
12.	ZEW indeks očekivanog povj. investitora – Njemačka	JUL	50,4	52,7	47,5
13.	Stopa inflacije – EZ F	JUN	2,0%	2,0%	1,9%
14.	Temeljna stopa inflacije – EZ F	JUN	2,3%	2,3%	2,3%
15.	Stopa inflacije – Italija F	JUN	1,7%	1,8%	1,7%
16.	Stopa inflacije – Španija F	JUN	2,2%	2,3%	2,0%
17.	Proizvođačke cijene – Njemačka (G/G)	JUN	-1,3%	-1,3%	-1,2%
18.	Proizvođačke cijene – Portugal (G/G)	JUN	-	-3,0%	-3,0%
19.	Stopa nezaposlenosti – Holandija	JUN	-	3,8%	3,8%

SAD

Zvaničnici FED-a u komentarima su naglasili ključne prioritete, od finansijske inkluzije do monetarne politike i institucionalne nezavisnosti. Predsjednica iz Clevelanda Hammack je izjavila da se želi uvjeriti u daljnji pad inflacije prije nego što podrži smanjenje kamatnih stopa, te naglasila da je potrebno čekati procjenu efekata novih trgovinskih politika na istu. Iako se očekuje da će FED, na sastanku krajem jula, zadržati referentnu kamatnu stopu na trenutnom nivou, većina kreatora monetarne politike preferira više vremena za procjenu uticaja carina. Logan iz Dallasa je istakla važnost održavanja stabilnih kamatnih stopa radi kontrole inflacije, ali je priznala mogućnost smanjenja istih ako ekonomski uslovi oslabe, upozoravajući na pretjerana smanjenja koja bi mogla destabilizovati ekonomiju. Barkin iz Richmonda je ukazao na neophodnu nezavisnost FED-a, izražavajući povjerenje u fokus sljedećeg predsjednika centralne banke na „zdravu politiku“. Williams iz New Yorka očekuje da će tarife povećati stopu inflacije za oko 1% do 2026. godine, te je istakao da podržava umjereno restriktivan monetarni stav FED-a, predviđajući ekonomski rast od 1% i stopu nezaposlenosti od 4,5% ove godine. Naglasio je važnost nezavisnosti centralne banke za ekonomsku stabilnost i potvrdio status američkog dolara kao snažne rezervne valute, uprkos njegovom nedavnom padu. Ekonomski savjetnik Bijele kuće Hassett je sugerisao da carinske politike predsjednika Trumpa nisu značajno podstaknule inflaciju, jer se sve više Amerikanaca odlučuje za kupovinu domaćih proizvoda.


Protekle sedmice je objavljen FED-ov izvještaj o stanju u privredi SAD-a, poznatiji kao „Beige Book“, u kojem je navedeno da je ekonomska aktivnost u SAD-u blago porasla između kraja maja i početka jula. To ujedno predstavlja poboljšanje u odnosu na prethodni izvještaj, u kojem je polovina regija prijavila blagi pad ekonomskih aktivnosti. Neizvjesnost je i dalje ostala visoka, što doprinosi kontinuiranom oprezu preduzeća. Svih 12 regija zemlje prijavilo je rast cijena, pri čemu preduzeća bilježe umjerene do izražene pritiske na ulazne troškove povezane s tarifama.

Na kraju sedmice Predstavnički dom je usvojio dva zakona o kriptovalutama, uključujući „Genius Act“, koji predstavlja sveobuhvatan pravni okvir za regulaciju stablecoina (kriptovalute čija je vrijednost vezana uz tradicionalne valute poput eura ili dolara).

Tabela 4: Kretanje ekonomskih indikatora za SAD

Red. br.	Ekonomski indikatori	Očekivanje	Stvarno stanje	Prethodni period
1.	Stopa inflacije (G/G)	JUN	2,6%	2,4%
2.	Temeljna inflacija (G/G)	JUN	2,9%	2,8%
3.	Indeks proizvođačkih cijena (G/G)	JUN	2,5%	2,7%
4.	Indeks uvezenih dobara (G/G)	JUN	0,4%	-0,2%
5.	Indeks izvezenih dobara (G/G)	JUN	1,9%	1,9%
6.	Maloprodaja (M/M)	JUN	0,1%	-0,9%
7.	Industrijska proizvodnja (M/M)	JUN	0,1%	0,0%
8.	Iskorištenost kapaciteta	JUN	77,4%	77,6%
9.	Broj zahtjeva za hipotekarne kredite	9. maj	-	1,1%
10.	Inicijalni zahtjevi nezaposlenih za pomoć	12. jul	233.000	228.000
11.	Kontinuirani zahtjevi nezaposlenih za pomoć	5. jul	1.965.000	1.956.000

Grafikon 2: Kretanje kursa EURUSD tokom protekle sedmice



USD je aprecirao u odnosu na EUR, te je kurs EURUSD zabilježio pad s nivoa od 1,1689 na nivo od 1,1626.

VELIKA BRITANIJA

Prošle sedmice su objavljeni podaci o inflaciji i stanju na tržištu rada u Velikoj Britaniji. **Stopa inflacije je u junu povećana na godišnjem nivou na 3,6% sa 3,4%**, koliko je iznosila u maju (očekivano 3,4%). Ovo je najviši nivo od januara 2024. godine, a izazvan je cijenama motornih goriva, transportnim troškovima i cijenama pića. Ovaj neočekivani rast inflacije dodatno komplikuje proces donošenja odluke BoE u vezi s daljnjim smanjenjima kamatnih stopa. Bez obzira na postepena smanjenja kamatnih stopa od augusta i dalje su prisutne zabrinutosti zbog rasta plata i ponude, a BoE predviđa da će inflacija dostići ciljani nivo od 2% do prvog kvartala 2027. godine. Učesnici tržišta povećali su početkom sedmice očekivanja smanjenja kamatnih stopa BoE nakon što je guverner Bailey nagovijestio da bi mogla uslijediti značajnija smanjenja ukoliko tržište rada oslabi brže od očekivanja, ali su nakon objavljivanja ovakvih podataka ta očekivanja smanjena. Iz očekivanja je izbačeno smanjenje referentnih kamatnih stopa u septembru, dok se i dalje očekuje jedno smanjenje u augustu, uz mogućnost dodatnog smanjenja do kraja godine. Podaci sa tržišta rada pokazuju da se ono hladi, mada sporije nego što je BoE očekivala. Poslodavci smanjuju zapošljavanje zbog viših minimalnih plata, povećanih doprinosa za društveno osiguranje i planiranih promjena u zakonu o zapošljavanju. Imajući u vidu sve manji broj oglasa za posao i sve veći broj onih koji traže posao, BoE će najvjerojatnije nastaviti postepeno da smanjuje kamatne stope bez obzira na upornu inflaciju. U intervjuu za The Times Bailey je istakao da je potreban postepen i pažljiv pristup bez obzira na to što je inflacija i dalje iznad ciljane vrijednosti. Bailey je kritikovao Trumpov trgovinski rat, te upozorio da bi taj rat mogao uzrokovati fragmentaciju globalne ekonomije i nanošenje štete domaćinstvima, te pozvao Kinu i SAD na saradnju, kako bi se posvetili trgovinskim nestabilnostima, koje su uzrok 40% globalnih problema.

Mann iz BoE je upozorila na to da strah od rasta nezaposlenosti i povećavanje iznosa računa podstiču domaćinstva u Velikoj Britaniji da štede „za crne dane“, što povećava procenat štednje i smanjuje ekonomski rast. Ovakvo oprezno ponašanje potrošača je dovelo do značajno nižeg rasta u sektorima kao što su ugostiteljstvo i maloprodaja. Hughes iz Ureda za budžetsku odgovornost (OBR) je upozorio Parlament da rizici u vezi s dugom Velike Britanije rastu, naglašavajući potrebu za izbalansiranim fiskalnim politikama.

Prema istraživanju Bloomberga, očekuje se da će ekonomija Velike Britanije u 2025. godini porasti za 1,1%, u 2026. za 1,2%, a u 2027. za 1,5%. Prognozira se da će rast BDP-a u drugom kvartalu ove godine iznositi 0,1% na kvartalnom nivou (prethodno očekivano 0,2%), a u trećem kvartalu 0,2% na kvartalnom nivou, kao što je i ranije očekivano. Prognozirana stopa inflacije u ovoj godini iznosi 3,2% na godišnjem nivou, a u 2026. godini 2,4% (ranije prognozirano 3,1% i 2,3%, respektivno). Očekuje se smanjenje referentne kamatne stope BoE na 4,00% do kraja trećeg kvartala ove godine s trenutnog nivoa od 4,25%, a vjerovatnoća nastanka recesije u narednih 12 mjeseci iznosi 30%.

Tabela 5: Kretanje ekonomskih indikatora za UK

Red. br.	Ekonomski indikatori	Očekivanje	Stvarno stanje	Prethodni period
1.	Stopa inflacije (G/G) JUN	3,4%	3,6%	3,4%
2.	Stopa temeljne inflacije (G/G) JUN	3,5%	3,7%	3,5%
3.	Stopa inflacije u uslužnom sektoru (G/G) JUN	4,5%	4,7%	4,7%
4.	Indeks maloprodajnih cijena (G/G) JUN	4,3%	4,4%	4,3%
5.	Indeks cijena kuća (G/G) MAJ	-	3,9%	3,6%
6.	Prosječne sedmične zarade tromjesečno (G/G) MAJ	5,0%	5,0%	5,4%
7.	ILO tromjesečna stopa nezaposlenosti MAJ	4,6%	4,7%	4,6%
8.	Broj inicijalnih zahtjeva nezaposlenih za pomoć JUN	-	25.900	15.300

Tokom protekle sedmice GBP je blago deprecirala u odnosu na EUR, pa je kurs EURGBP zabilježio rast s nivoa od 0,86644 na nivo od 0,86675. GBP je deprecirala i u odnosu na USD, pa je kurs GBPUSD smanjen s nivoa od 1,3493 na nivo od 1,3416.

JAPAN

Ministar finansija Japana Kato je na sastanku G-20 izjavio da tarife nisu efikasan način za rješavanje trgovinskih neravnoteža i apelovao na domaća rješenja. Japan se suočava s tarifama SAD-a od 25% na automobile i čelik, uz moguće dodatno povećanje. Kato je naglasio važnost slobodne trgovine i stabilne ekonomske politike u vrijeme globalnih trgovinskih tenzija. Predsjednik Asocijacije japanskih bankara Junichi je upozorio na moguće smanjenje kreditnog rejtinga ukoliko se javni dug nastavi nekontrolisano povećavati.

Premijer Japana Ishiba je obećao da će ostati na funkciji uprkos historijskom porazu njegove vladajuće koalicije na izborima za Gornji dom u nedjelju. Liberalno-demokratska stranka i njen partner Komeito su prvi put od 1955. godine izgubili većinu u ovom domu, što ukazuje na nezadovoljstvo javnosti zbog inflacije i troškova života. Ishiba se sada suočava s izazovima u ostvarivanju rasta plata, dostizanju ciljeva BDP-a i rješavanju sigurnosnih pitanja, dok istovremeno mora da upravlja podijeljenom opozicijom i užom zakonodavnom većinom. Koalicija je izgubila 19 mjesta, što povećava zabrinutost zbog političkog zastoja, trgovinskih pregovora sa SAD-om i mogućih ustupaka opoziciji, poput smanjenja poreza na promet. Rezultati izbora ističu povećano nezadovoljstvo birača ustaljenim političkim strankama. Ministar finansija SAD-a Bessent i premijer Japana Ishiba su razgovarali o mogućnosti „dobrog sporazuma“ u vezi s tarifama, iako nisu spominjani konkretni uslovi. Oba leaderska tima su se obavezala na daljnji konstruktivni pregovor, a trgovinski pregovarač Japana Akazawa planira posjetu SAD-u sljedeće nedjelje.

Prema bivšem ekonomisti BoJ Hayakawi, inflacija u Japanu bi mogla podstaći BoJ da poveća referentnu kamatnu stopu već u oktobru ukoliko se smanje neizvjesnosti u vezi s tarifama.

Predsjednik Asocijacije trgovaca vrijednosnim papirima Japana Hibino očekuje da će BoJ postepeno povećavati kamatne stope, vjerovatno početkom 2026. godine, pažljivo prateći realnu ekonomiju. Podaci sa svop tržišta pokazuju da trgovci vide 60% šansi za povećanje kamatne stope ove godine, dok istraživanje Bloomberg-a među ekonomistima pokazuje da ih 34% očekuje sljedeće povećanje u januaru 2026. godine, dok 30% predviđa povećanje u oktobru 2025. godine.

Tabela 6: Kretanje ekonomskih indikatora za Japan

Red. br.	Ekonomski indikator		Očekivanje	Stvarno stanje	Prethodni period
1.	Porudžbine osnovnih mašina (G/G)	MAJ	5,2%	4,4%	6,6%
2.	Industrijska proizvodnja (G/G) F	MAJ	-1,8%	-2,4%	0,5%
3.	Iskorištenost kapaciteta (M/M)	MAJ	-	2,0%	1,3%
4.	Trgovinski bilans (mlrd JPY)	JUN	353,9	153,1	-638,5
5.	Izvoz (G/G)	JUN	0,5%	-0,5%	-1,7%
6.	Uvoz (G/G)	JUN	-1,1%	0,2%	-7,7%
7.	Inflacija (G/G)	JUN	3,3%	3,3%	3,5%
8.	Temeljna inflacija (G/G)	JUN	3,3%	3,4%	3,3%

JPY je tokom protekle sedmice deprecirao u odnosu na EUR, te je kurs EURJPY zabilježio povećanje s nivoa od 172,30 na nivo od 173,00. JPY je deprecirao u odnosu na USD, te je kurs USDJPY zabilježio povećanje s nivoa od 147,43 na nivo od 148,81.


NAFTA I ZLATO

Cijena jednog barela sirove nafte na otvaranju tržišta u ponedjeljak je iznosila 68,45 USD (58,56 EUR).

Početkom sedmice cijena nafte je smanjena usljed rastuće ponude i zabrinutosti zbog usporavanja globalnih ekonomija, nakon što je predsjednik Trump obnovio prijeteće carinama. Smanjenje cijene nafte je nastavljeno i tokom trgovanja u utorak i srijedu jer je zabrinutost zbog ekonomskog uticaja američkih tarifa nadmašila kinesku potrošnju sirove nafte. Zemlje članice OPEC-a su zadržale prognoze rasta globalne potražnje za naftom za 2025. i 2026. godinu, navodeći pozitivne ekonomske izgleda, pri čemu su Indija, Kina i Brazil nadmašili očekivanja, a SAD i eurozona su u fazi oporavka. Predviđaju se i bolji ekonomski rezultati u drugoj polovini 2025. godine, uprkos trgovinskim tenzijama. Članice planiraju povećati proizvodnju za 548.000 barela dnevno u augustu kako bi povratile tržišni udio, nakon povećanja proizvodnje od 349.000 barela dnevno u junu. Potrošnja sirove nafte u rafinerijama je porasla za 2,1 milion barela dnevno u junu, podstaknuta ljetnom potražnjom za naftom, a očekuje se da će ostati visoka. API je objavio da su zalihe američke sirove nafte porasle u sedmici zaključno sa 11. julom za 3,4 miliona barela. Ukupne zalihe su 0,5% niže nego prethodne sedmice, ali 1,3% više u odnosu na prethodnu godinu, što je i dalje 8% ispod petogodišnjeg prosjeka. Iskorištenost rafinerija je blago smanjena na 93,9%. U četvrtak je pad cijene zaustavljen usred tenzija na Bliskom istoku, kao i slabih investicija. Cijena nafte je ponovo zabilježila smanjenje na kraju sedmice pod uticajem novih EU sankcija usmjerenih na Rusiju. Sankcije uključuju smanjenje najvišeg nivoa cijene (na 47,6 USD po barelu) za rusku naftu od strane G7 grupacije, zabranu uvoza naftnih derivata proizvedenih od ruske rude i targetiranje najveće Rosneftove indijske rafinerije.

Na zatvaranju tržišta u petak cijena jednog barela nafte je iznosila 67,34 USD (57,92 EUR), što predstavlja smanjenje od 1,62% na sedmičnom nivou.

Grafikon 3: Kretanje cijene nafte tokom protekle sedmice



Na otvaranju londonske berze metala u ponedjeljak cijena jedne fine unce zlata je iznosila 3.355,59 USD (2.870,72 EUR).

Cijena zlata je početkom sedmice zabilježila smanjenje, pod uticajem carina koje je predsjednik Trump najavio od 1. augusta, kao i pod uticajem aprecijacije USD.

Smanjenje cijene ovog plemenitog metala je zaustavljeno tokom trgovanja u srijedu usred zabrinutosti podstaknutih američkim tarifama. U četvrtak je cijena zlata ponovo korigovana naniže pod uticajem objavljivanja podataka o porastu sklonosti ka riziku na tržištu kapitala. Analitičari su istakli da se zlato u prošlosti pokazalo kao aktiva sigurnog utočišta kada se povećaju trgovinske tenzije, a kretanje cijene ovog plemenitog metala prema 3.350 USD po unci je dokaz da se ovaj obrazac ponovo odvija. Centralna banka Gane planira hedžirati cijene izvoza zlata kako bi zaštitila prihode i stabilizovala rezerve, koje su dostigle 11,1 milijardu USD, a što pokriva 4,8 mjeseci uvoza. Izvoz zlata ove države je porastao za 76% na godišnjem nivou (na 5,2 milijarde USD do aprila), povećavajući trgovinski suficit na 4,1 milijardu USD i dovodeći do rasta vrijednosti lokalne valute (cedi) za 40%, te je ista sada druga po redu svjetska valuta s najboljim performansama. Cijena zlata je na kraju sedmice korigovana naviše. Indonezija je najavila planove da uvede takse na izvoz zlata i uglja počevši od iduće godine, ako globalne cijene prekorače njihovu ekonomsku vrijednost.

Na zatvaranju tržišta u petak cijena jedne fine unce zlata je iznosila 3.349,94 USD (2.881,42 EUR), što predstavlja blagi pad od 0,17% na sedmičnom nivou.

Grafikon 4: Kretanje cijene zlata tokom protekle sedmice

